



Meeqqat Angerlarsimaffiat Tupaarnaq  
Sipisaq Kujalleq 9  
3900 Nuuk

30. april 2019

Nal. nr./j.nr.: 2018-900-0023

All. nr./brevnr.: 60419

Sull./sagsbeh.: LARI/jh

## **INAARUTAASUMIK NALUNAARUSIAQ**

### **Meeqqat Angerlarsimaffianni Tupaarnami misissuineq**

#### **1. Aallaqqaasiut**

Meeqqat Angerlarsimaffianni Tupaarnami (matuma kingornatigut Tupaarnamik taaneqartartussami) Nuummiittumi misissuineq Inatsisartut Ombudsmandiannit misissuiartortunit 27. aamma 28. februar 2019-imi ingerlanneqarpoq. Misissuineq Ombudsmandip ataatsimut sulineranut ilaatillugu ingerlanneqarpoq, taamaalillunilu naammagittaalliummik tunngaveqarani ingerlanneqarluni.

Misissuiartortut tassaapput siunnersortit pisortaat Lasse Risager, fuldmægtig Henrik Bach aamma nutserisoq/oqalutsi Ole Heinrich, tamarmik Ombudsmandeqarfimi atorfeqartitaasut. Taakkua saniatigut Meeqqat Pisinnaati-taaffiitut Sullissivimmi MIO-mi siunnersorti Nauja Benjaminsen peqataavoq. Misissuinerup ilaa Kommuneqarfik Sermersuumi suliassaqarfiup pisortaanit Ellen Magnussenimit peqataaffigineqarpoq.

Misissuinermi eqqartorneqartut ilaannaat nalunaarusiami matumani ilanngunneqarput.

Tupaarnaq nalunaarusiaq manna pillugu oqaaseqaatiminik saqqummiussinissaminut periarfissinneqarsimavoq, 29. april 2019-imi nalunaarluni nalunaarusiaq paaqqinniffiup oqaaseqaateqarnissaanut pissutissaqalersitsingitsoq.

## **2. Misissuinermi inatsiseqartitsinikkut tunngavigisaq**

Ombudsmandip sulineranut inatsiseqartitsinikkut tunngavigisaq Inatsisartut Ombudsmandiat pillugu Inatsisartut inatsisaanni (matuma kingornatigut Ombudsmandi pillugu inatsimmik taaneqartartussami) nr. 7-imi, 1. juni 2017-imeersumiippoq.

Inatsisartut Ombudsmandiat Inatsisartunit qinerneqartarpoq, tak. Ombudsmandi pillugu inatsimmi § 1, imm. 1, sulinerminili Inatsisartunut attuumasuteqartuunani, tak. § 6, imm. 1.

Kalaallit Nunaanni Namminersorlutik Oqartussat kommunillu ataanni pisortat ingerlatsiviisa ilaat tamarmik Ombudsmandip sulinerani pineqartunut ilaatinneqarput, tak. Ombudsmandi pillugu inatsimmi § 7, imm. 1-imi oqaaseqatigiit siulliit.

Oqartussaasut inuillu Ombudsmandip sulinerani pineqartunut ilaatinneqartut inatsiseqartitsineq atuuttoq unioqqutillugu iliuuseqarnersut suliassaminnilluunniit ingerlatsinerminnut atatillugu allatigut kukkussuteqarnersut sumiginnaanersulluunniit Ombudsmandip nakkutigisassaraa, tak. Ombudsmandi pillugu inatsimmi § 19, imm. 1. Ombudsmandi isornartorsiuisinnaavoq, inassuteqaateqarsinnaalluni suliamillu paasinninnini aamma saqqummiussinnaallugu, tak. Ombudsmandi pillugu inatsimmi § 20.

Ombudsmandi pillugu inatsimmi § 16-imi oqaaseqatigiitsigut siullertigut aalajangersarneqarpoq paaqqinniffiit suliffeqarfilluunniit Ombudsmandip sulinerani pineqartunut ilaatinneqartut suulluunniit Ombudsmandip misissorsinnaagai. Taamatut misissuinermut atatillugu – Ombudsmandi pillugu inatsimmi §§-ini 19-imi 20-milu aalajangersarneqartut saniatigut – Ombudsmandip pissutsit paaqqinniffiup aaqqissuussaananeranut ingerlanneqarneranullu tunngasut kiisalu pissutsit paaqqinniffimmik atuisut pineqartarneranut taakkulu pillugit ingerlatanut tunngasut inuppalaartumik misigittartumillu isiginnittaaseq aallaavigalugu naliliiffigisinnaavai, tak. Ombudsmandi pillugu inatsimmi § 16-imi oqaaseqatigiit aappaat.

### **3. Misissuinerup piareersarneqarnera ingerlanneqarneralu**

Tupaarnaq misissuiartussamaarnermik oqarasuaatikkut 10. januar 2019-imi ilisimatinneqarpoq. Misissuineq pillugu paasissutissat amerlanerusut Tupaarnap allakkatigut 15. januar 2019-imeersutigut tiguai. Tupaarnaq tamatumunnga peqatigitillugu qinnuigaara sulisut, najugaqartut ilaqutaasullu taamaasa misissuisoqassamaarneranik misissuiartortunillu oqaloqateqarnissamut periarfissaqarnerannik ilisimateqqullugit.

Paaqqinniffik, sulisut najugaqartullu pillugit allakkatigut paasissutissat assigiinngitsut misissuineq sioqqullugu Tupaarnamit tiguakka.

Misissuiartortut paaqqinniffimmi ilaqutaasunik pingasunik misissuineq ullormik ataatsimik sioqqullugu oqaloqateqarput. Oqaloqatiginninnerit marluk Ombudsmandeqarfimmi ingerlanneqarput, pingajuallu oqarasuaatikkut ingerlanneqarluni.

Misissuinermi 27. aamma 28. februar 2019-imi ingerlanneqartumi pisortaq aamma immikkoortorta qarfinni pisortat marluk misissuiartortunit oqaloqatigineqarput. Taakkua saniatigut sulisut tallimat najugaqartullu sisamat ataa-siakkaarlugit misissuiartortunit oqaloqatigineqarput. Paaqqinniffiup initai misissuiartortunit aammattaq misissorneqarput.

Paaqqinniffimmi 2018-imi aamma 2019-imi pissaanermik atuisimaneq pillugu nalunaarutiginninnermi immersukkat pingasut misissuinerup kingornatigut Tupaarnamit tiguakka.

### **4. Tupaarnaq pillugu ataatsimut oqaatigisassat**

Tupaarnaq kommunip meeqqanik inuusuttunillu ulloq unnuarlu paaqqinniffutigaa. Paaqqinniffik Kommuneqarfik Sermersuumit ingerlanneqarpoq, initaalu Nuummiillutik.

Tupaarnaq Meeqqanut Immikkoortorta qarfinnut najugaqartunut 6-12-inik ukiulinnut arfinilinnut inissalimmut aamma Inuusuttunut Immikkoortorta qarfinnut najugaqartunut 12-18-inik ukiulinnut pingasunut inissalimmut

avinneqarsimavoq. Immikkoortortaqaarfiit marluk taakku illumi quleriillutik immikkoortillugit inissinneqarsimapput.

Paaqqinniffimmi misissuinerup nalaani najugaqartut qulingiluaapput sulisullu 15-iullutik.

### **5. Ombudsmandip pingaarnerusutigut naliliinera**

Tupaarnaq paaqqinniffittut najugaqartunut toqqissisimanartunik angerlarsimaffippalaartunillu avatangiiseqarnissamik, najugaqartunullu pissaanerup sapinngisamik annertunerpaamik atornaveersaarneqarneranik qitiutitsisutut pitsaasorujussuarmik paasisaqarfigaara.

Najugaqartut, sulisut ilaqutaasullu paaqqinniffik nersualaartorujussuaat. Sulisut misissuiartortunit oqaloqatigineqartut paarsilluartuusut, nalunngatiginnissuseqarluartuusut ilumoorfiginnittuusullu malunnarpoq. Init eqqiluitsuupput, kusanartuullutik nuannersuutillu.

Pissutsit ataasiakkaat oqaaseqaateqarnissannut pissutissaqalersippaangga. Taakku tulliuttuni imm. 6-imi 7-imilu allaaserineqarput.

### **6. Pissaanermik atuisarneq pillugu inatsisip meeqqanut angajoqqaanullu ilisimatitsissutigineqartarnera**

Meeqqanut inuusuttunullu 18-it inorlugit ukiulinnut ulloq unnuarlu paaqqinniffimmi inissinneqarsimasunut pissaanermik atuisarneq pillugu malittari-sassat isumaginninnermik suliassaqaarfimmi pissaanermik atuneq pillugu Inatsisartut inatsisaanni nr. 1-imi, 21. november 2013-imeersumi kingusinnerusukkut allannguuteqartinneqarsimasumi (matuma kingornatigut pissaanermik atuisarneq pillugu inatsimmik taaneqartartussami) immikkoortuni I-imiipput II-miillutillu (§§-ini 1-imit 29-mut).

Pissaanermik atuisarneq pillugu inatsimmi § 27-kkut aalajangersarneqarpoq meeqqat inissinneqarsimasut angajoqqaatullu oqartussaassusermik tigungmiaqartut inatsimmi immikkoortumi II-mi (§§-ini 4-mit 29-mut) malittari-sassanik ilisimatinneqarnissaat ulloq unnuarlu paaqqinniffiup pisortaata qu-

lakkiissagaa, matumani tulleriinneri malillugit kommunalbestyrelsimut aamma Isumaginninnermi Naammagittaalliuteqartarfimmut §§-it 24 aamma 26 tunngavigalugit naammagittaalliornissamut periarfissaqarnera ilanngullugu eqqarsaatigalugu.

Inatsimmi § 27 piareersarlugu sulianit erserpoq meeqqap angajoqqaatullu oqartussaassusermik tigummiqartup sunik pisinnaatitaaffeqarnerminnik ilisimasaqarnissaat kiisalu ulloq unnuarlu paaqqinniffimmi sulisut meeraq eqqarsaatigalugu pissaanermik atuinermi qanoq iliuuseqartarnissaat aalajangersakkap taassuma qulakkiissagaa.

Tupaarnami pisortap misissuinnermi nassuiaatitut oqaatigaa ass. sulisut najugaqartunik tigupiluueqqusaannginnerat, najugaqartunut suangasaqqusaannginnerat najugaqartunillu oqaasipiluusseqqusaannginnerat paaqqinniffiup najugaqartunut angajoqqaanullu oqartussaassusermik tigummiqartunut oqaloqatiginnissutigisarai. Paaqqinniffiulli pissaanermik atuisarneq pillugu inatsit nammineq, matumani pissaanermik atuisoqarsimanera pillugu naammagittaalliornissamut periarfissaqarnera ilanngullugu eqqarsaatigalugu, oqaluttuarineq ajorpaa.

*Inassuteqaatigaara pissaanermik atuisarneq pillugu inatsimmi immikkoortumi II-mi malittarisassat, matumani kommunalbestyrelsimut aamma Isumaginninnermi Naammagittaalliuteqartarfimmut naammagittaalliornissamut periarfissaq ilanngullugu eqqarsaatigalugu, najugaqartunut angajoqqaatullu oqartussaassusermik tigummiqartunut ilisimatitsissutigineqartarnissaat Tupaarnap pissaanermik atuisarneq pillugu inatsimmi § 27 tunngavigalugu qulakkiissagaa.*

## **7. Pissaanermik atuisarneq pillugu inatsisip tiguneqarneranut uppernarsaat**

Pissaanermik atuisarneq pillugu inatsimmi § 29-kkut aalajangersarneqarpoq inatsit ulloq unnuarlu paaqqinniffinni tamani inatsimmi pineqartunut ilaatinneqartuni sulisunut tunniunneqartassasoq, sulisullu inatsimmik tigusaqar-

nertik ulloq unnuarlu paaqqinniffiup pisortaanut uppersarsarlugu atsiortasasut.

Tupaarnami pisortap misissuinerup ulluani siullermi oqaatigaa sulisut tamar-mik pissaanermik atuisarneq pillugu inatsimmik e-mailikkut nassinneqartartut, tigusaqarnertilli uppersarsarlugu atsiornissaannik qinnuigineqarneq ajortut. Sulisut tigusaqarnertik uppersarsarlugu atsiortarnissaminnik paasitinneqarnissaat pisortap isumaginiarpaa.

Pisortaq misissuinerup ulluisa aappaanni oqarpoq sulisut arlallit atsioqqullugit massakut qinnuigineqarsimasut, sulisullu sinneri ullup ingerlanerani kingusinnerusukku tamatumingna qinnuigineqarumaartut.

*Paasissutissiissutigineqartut tusaatissatut tiguakka.*

## **8. Malitseqartitsineq**

Tupaarnaq qinnuigaara nalunaarusiaq manna sulisunut, najugaqartunut ila-qutaasunullu paasissutissiissutigeqqullugu.

Nalunaarusiap matuma assilinera Isumaginninnermut Inatsisinillu Atuutsitsinnermut Naalakkersuisoqarfimmut ilisimatitsissutitut nassiuppara.

Tupaarnamik misissuineq matumuuna inaarlugu suliarineqartut isigaara.

Nalunaarusiaq manna 2019-imi ukiumoortumik nalunaarutinni ilanngunneqarumaarpoq, nittartakkannilu [www.ombudsmandi.gl](http://www.ombudsmandi.gl)-imi tamanut saqqummiunneqarumaarluni.

Inuulluaqqusillunga

  
Vera Leth